

Gobierno ta esun cu a insisti pa esey!

Ley di CAFT no ta algo permanente pa Aruba



ORANJESTAD (AAN): Diahuebs ultimo na Parlamento a tuma lugar tratamiento di e ley di CAFT. Un reunion cu no a bay asina facil pero cu a termina te den oranan di anochi. Fraccion di AVP a sostene e ley aki. Prome Minister Eman relaciona cu e reunion aki a duna di conoce cu e Ley di CAFT tabata uno importante pa pais Aruba.

El a haya lamentable cu

oposicion tabata trece dos punto dilanti cu no tin nada di haber cu e Ley di CAFT y pa cual e tabata contento cu Partido MEP a worde desenmascara riba e dos puntonan aki.

Pa cuminsa den e ley no tin ningun medida, y esaki inclusive a worde señala door di Parlamentario di PDR Andin Bikker. El a splica e hecho cu Gobierno a bisa

cu nan lo bay baha e deficit, esaki a worde traduci door di oposicion cu esaki ta nifica medida. “Nos Gobierno a demostra caba cu den pleno crisis mes, ora cu nos a haya Aruba cu 15% di caida den economia, a percura pa guia Aruba di un forma cu no a pone e pueblo paga pa e mal gobernacion di 8 año di MEP, tampoco pa e crisis mundial ni pa e cierre di e refineria.

Awor cu nos tin estabilidad y perspectiva, no ta e intencion di nos pa trece e cuenta aki pa e ciudadanonan manera tempo di partido MEP.”

Prome Minister Eman, mescos cu den Parlamento, a recorda cu MEP tin un trayecto hopi largo di ki ora cu tin retonan economico den pais Aruba, nan tin solamente un solucion cu ta medida. E ta kere cu momento cu nan a lesa cu Gobierno ta bay baha deficit a pensa cu e unico forma ta esun cu nan semper a implementa: medida. Sinembargo Prome Minister Eman a señala cu su partido den Gobernacion durante 5 pa 6 año y den pleno crisis a logra haci ahustenan cu ta minimalisa e efectonan negativo pa e pueblo. Y a inverti den progreso di e economia, progreso social pa e ciudadanonan renobando barionan, biniendo cu indexing, renobando school, schoolkinder toeslag, reparatie toeslag. ... “Pues ta mira un linea di consistencia di nos Gabinete unda semper ta yuda pa mantene e poder di compra di nos hendenan,” Eman a señala.

El a splica tambe cu tin biaha mester a haci ahustenan pa

scapa fondo p.e. di pensioen di grandinan of AZV, pues no pa enrikese e caha di Gobierno pa despues saca esaki pa yuda famia y amigonan manera a sosode bou Gobierno di MEP.

E di dos punto tambe a keda hopi cla. “SI pa simannan largo a lanta e hendenan pa bini Parlamento pasobra autonomia di Aruba ta worde bendi y ta haya un grupo limita, mester ta un señal pabo cu pueblo no a acepta e mensahe. Mi ta kere cu e motibo cu pueblo no a acepta e mensahe ta pasobra pueblo a mira Gobierno su firmesa ora cu tin metemento di Hulanda den nos presupuesto. Nos a hiba un lucha firme. Hulanda tabata kier un ley permanente pa un CFT den forma di un rijkswet of un Algemeen Maatregel van Rijksbestuur. Pero nos a bisa cu nos no kier esey. Na final nos a haci un compromiso unda cu, pa tranquilidad di Reino, nos a bisa cu pa un tempo cortico esaki ta worde acepta te ora cu logra un Presupuesto balansa. E ley ta bisa cla cu ora di un presupuesto balansa, e ley aki ta vence. E punto aki a bini riba nos insistencia.”